




Ngoenzneix dwg ngoenzndei,
Beixnuengx daeuj doxhoh,
Gwn laeuj youh gwn noh,
Angqfofo gvaq ngoenz.

Lwg nuengx coux bawxmoq,
Lauxgo haq lwg sau,
Daengx boux nyaeq boux laux,
Nauh lumj gvaq ndwencieng.

“Gyoengq beixnuengx baengz-
youx, byaek cawj ndei lo, daeuj gwn
ngaiz lo——” Boux dajcawj ndeu
ndwn youq bakdou ranz Lauxngeih,
song fwngz dop bak heuh hwnjdaej.

Rog ranz, vunzhek gveujfoed-
foed, gyoengqde ngoenzneix cungj
daeuj angqhoh Lauxdaih caeuj Laux-
ngeih.

Lauxngeih 50 lai bi, naj luenz,
miz mumh, miz vah naeuz “namh oem
cij hwnj haz, naj ndei cij hwnj mumh”.
Lauxngeih naj dwg mbouj ndei, hoeng
de ndang ndei, 4 bi seizgan couh
laebdaeb miz 3 daeg lwgsai. Lauxgo
de caeuj de doxfanj, 4 bi ndawde,
laebdaeb miz 3 dah lwgmbwk, seizneix
gyoengqlwg gyoengqde cungj majhung
lo.

Lwgmbwk maj lumj rangz,
Lwgsai sang gvaq boh,
Mbouj caux gya baenz hoh,
Doiq cojcoeng mbouj gvaq.

Mbwk ngeihcib baenz haq,
Sai ngeih haj baenz coux,
Daxboh muengh dang baeuq,
Daxmeh siengj au lan.

Ngoenzneix Lauxdaih caeuj
Lauxngeih couh muengh daengz
ngoenzndei lo, Lauxngeih coux lwg-
bawx, Lauxdaih haq lwgsau, beix-
nuengx song ranz doengzcae cingj
laeuj, mwngz naeuz nauhyied mbouj
nauhyied, mwngz naeuz angqyangz
mbouj angqyangz.

Gienh saeh angq neix gangj daeuj
goj raez lo.

Daegdungh dwg daeglwg Laux-
ngeih, de youq baihrog dajgoeng
haujlai bi lo, bi daengz haemh cij
dauqranz baez ndeu, baebae dauq-
dauq cungj dwg: Bae boux vunz ndeu,
dauq boux dog. De ndaej 25 bi lo, hab
aeu yah lo.

Bi’ gvaq haemhndaep, gwn caeuz
sat le, geij bohlgw naengh gyang ding
ganggoj, Lauxngeih naeuz: “Sou 3
daeg, bouxboux gen hung ga maengh,
miz goet miz rengz, seizlawz cij ra

ndaej yah dauqranz?

Miz fwen naeuz:
‘Song duz bya rieng nding.
Duz sing (ciengj) duz bae gonq,
Duz bae gonq daengz vaengz,
Duz bae laeng gak raiq.’”

Mehngeih naeuz: “Seizneix aeu
boux bawx he mbouj yungzheih, ranz
raeuz 3 daeg lwgsai, baenzlawz gangj
hix hawj Daegdungh aeu gonq, de dwg
lauxdaih.”

Ngoenz co’it, bouxbmanj ceiq
majj cunz ranz, ranz gwnz bae ranz laj
ganggoj, ranz gyang bae ranz henz
lwnh saeh, miz laeuj gwn laeuj, miz
noh gwn noh, ngoenzneix bouxbmanj
couhdwg beixnuengx, ranznden couh-
dwg caencik, mbouj faen mwngz gou.
Mehmoiz ndaw mbanj daeuj daengz
ranz Lauxngeih, mehmoiz naeuz:
“Mbanjsangh miz dah sau ndeu heuh
Dahgvai, ndanggoet nienzgeij caeuj
Daegdungh cingq ngamj baenz doiq
ndeu, mwngz yungh mbouj yungh gou
bae camcam.” Lauxngeih cingq vih
gienh saeh neix sieng uk, cien gouz
fanh gouz mehmoiz vaiqdi bae cam.

Ndwencieng gvaq mbwn couh
ciemhciemh raeuj lo, seiz dajndaem
hix yaek haihong, mehmoiz ndaej vah
dauq lo.

Mehmoiz naeuz: “Ranz Mbanj-
sangh haenx singq Banh, ranz de miz
boux sai song boux mbwk, lwgsai
Lauxdaih Banh Singhdouj yaek ndaej
40 hix lij caengz miz yah, ranz de
naeuz miz haeux guhdoi naengj, miz
caengq guhdoi yungh, danghnaeuz
mwngz baihneix miz dahsau he hawj
ranz de guh lwgbawx, ranz de couh
nyienh haq Dahgvai gvaqdaej.”

Lauxngeih naemj: Vuenh cwz
vuenh vaiz yien cag couh ndaej, vuenh
bit vuenh gaeq cang raep couh baenz,
hoeng vuenh vunz mbouj yungzheih
ha. Engq mbouj yungh gangj de bae
gizlawz ra ndaej dahlwg ndeu haq
gvaqbae ne?

Lauxngeih cingq nyaeuq naj seiz,
mehmoiz lumj rox maz nei vixvix
ranz Lauxgo de. Deng lo! Lauxngeih
naemj le yaep he, angq dwk gag
bekfwngz baez he, riu soengq
mehmoiz le doq bae ra lauxgo de lo.

Lauxdaih vunz sang ndang reux,
naj loq byom. De vaiz dai gaeu mbouj
reuq, meuz roz gyauej mbouj roz,
laebdaeb miz 3 dah lwgmbwk le, de
miz di sim mbouj nyienh, cungj naemj

baenzlawz hix aeu seng daeg lwgsai
he, gwq ienq mehyah de miz daemz
ciengx mbouj baenz bya, miz naz
ndaem mbouj ndaej haeux, baenzlawz
hix seng mbouj ndaej lwgsai daeuj.

Dah lwgdaih Lauxdaih heuh
Dahnaq, bineix ngeihcib seiq, haj, de
naj maeq ndang luenz, gyaunde
dangqmaz. Seizneix lwg maj baenz
sau, rangz laux baenz faex lo, hoeng
miz lwgmbwk gyang ranz, mbouj miz
gvan daeuj boiq, 3 dahlwg cungj
mbouj caengz miz cawj.

Ngoenzngoenz bae aeu nywj,
Ciengx cwz rox ciengx vaiz,
Nyaz loeg doeng caengz gai,
Lauheiq dai laj riengh.

Gienh saeh neix, Lauxdaih sieng
gvaq mbouj noix ukgyaeuj.

Ngoenzneix, Lauxngeih naj riu-
nyumnyum hwnj dou daeuj, Lauxdaih
mbouj naemj hix rox miz saehndei,
Lauxngeih doiq Lauxdaih naeuz
baenzneix baenzneix, Lauxdaih dingq
le, hix bekfwngz hwnjdaej, daengx
naj hai riu.

Ngoenz he haetromh, ndaw rungh
mok haet lij caengz sanq, vunz ranz
Banh couh daeuj daengz ranz
Lauxdaih camyah. Ranz Lauxngeih hix
baij vunz bae ranz Banh camyah, couh
yienghneix, song mbanj sam ranz gap
baenz caen lo.

Gofaex youq gyang ndoeng,
Faenz roengz couh baenz yungh,
Ngoenzneix ciengx lwg hung,
Gap gyoengq guh ranz ndeu.

Rog ranz, bauqrengh yiengj ndaej
bibi baba, beixnuengx caencik mbouj
dingz mbouj duenh, ranz Lauxngeih
roq gyong daj laz, ranz Lauxdaih
caimax gwn laeuj.

Dahnaq boux ndeu ndoj hauej
ndaw rug bae, yaek gangj gangj mbouj
ndaej, yaek daej daej mbouj ok, de
dailix mbouj siengj haq hawj Banh
Singhdouj. Seizneix godangz yaek aeu
bawx, de aeu haq bae ranz Banh. Caen
dwg heuh mbwn mbwn sang, heuh
namh namh laeg, mbouj rox baenzlawz
guh ndei.

Lwg byag meh okdou,
Daej ndang fouz ndang naet,
Lwg lumj gaiq sauqbaet,
Duzmaet hix mbouj lah.

Lwg byag meh roengz lae,
Daej da foeg da gawh,
Mbouj dwg lumj bae haw,

Youz mbawq(mbwaq) le couh dauq.
Dahnaq doq daej doq yamq sang
yamq daemq gaen vunzlai bae ranz
Banh.

Dahnaq youq ranz Banh Singh-
douj ndaej 3 ngoenz lo, geij ngoenz
neix Dahnaq ngang dangqmaz, Banh
Singhdouj mbouj gamj gaen de.

Ciuq sibgvenq, daengz ranz gvan
3 ngoenz le couh aeu dauq ranzmeh
baez ndeu, Dahnaq angq lumj duzroeg
ok rongz nei, caeuxcaeux couh sousib
doxgaiq, ngaiz hix mbouj gwn couh
okdou.

Seizhah haetromh, raemxraiz gig
naek. Dahnaq boux dog byaij youq
gwnz roen bya, din vaq dumzcatcat
liux, yamq din naek lumj ga venj rin
nei. De naemj: Banh Singhdouj
nienzgeij laux mbouj youqgaenj, hoeng
de vunz gik youh ngah laeuj lumj
mingh, baenzlawz hix mbouj ndaej haq
hawj ndaek vunz neix.

Dahnaq naemj dwk naemj dwk,
daeuj daengz henz goengloh lo,
seizneix cihek cingq daeuj daengz, de
mbouj caiq ngeix saek yaep couh hwnj
ci bae.

Gangj daeuj hix ngamjhab,
seizneix vunzmbanj cingq nyaengq
ndaemcin, Dahgvai daj dauqbae
ranzmeh le, hix mbouj raen caiq dauq.
Lauxngeih couh bae cam Lauxgo
Dahnaq dauq gvaq ranzmeh mbouj
caengz, song beixnuengx doxcam vah
caengz gyoet, vunz ranz Banh hix
daeuj ra Dahnaq lo.

Daihgya cungj geizheih lo,
Dahnaq daj roengz lae ngoenzhaenx
couh mbouj raen dauq gvaq, seizneix
ranz Banh dauqdaej ra vunz?
Dauqdaej dwg gyoengqde daeuj ra
raeuz aeu vunz roxnaeuz raeuz bae ra
gyoengqde aeu vunz ni?

Saehcingz miz di doxgveuj lo,
Dahnaq mbouj dauq ranz Banh,
Dahgvai hix mbouj dauq ranz
Daegdungh, song ranz vunz couh
yienghneix doxdingj dwk.

Bi ndeu gvaqbae, song bi gvaq-
bae, sam bi gvaqbae…… Dahnaq lix
mbouj raen vunz, dai mbouj raen goet.
Daegdungh caeuj Dahgvai hix mbouj
cai baenz gvanbaz.

Dahnaq bae gizlawz? Mbouj miz
vunz rox, boh de Lauxdaih engq mbouj
rox. Caen dwg:

Lwg iq muengh lwg hung,
Lwg baenz lungz miznaj,
Lwg laux mbouj dingqvah,
Vaih faj naj bohme.

Laeuj noh hix gwn gvaq,
Gyaqcang hix caux caez,
Ngoenzneix lwg mbouj bae,
Saetlaex yaek dai vunz.

Gou mbouj miz lwgsai,
Hai lwgmbwk bae vuenh,
Boh cien suenq fanh suenq,
Lwg dauq haih bouxlaux.

Caez guh vunz laj dei,
Mbouj hei q daenj hei q gwn,
Guhdoi youq lajmbwn,
Mbouj lumj vunz lumj duz.

Ngoenz ndeu, Lauxdaih sousib
doxgaiq, boux ndeu okdou bae lo,
vunzmbanj cungj laihaeuz de bae
dajgoeng, couh mbouj miz vunz dawz
haeujsim lo.

(*caengz sat*)